

ORGANIZAÇÃO DA MULHER TIMORENSE (OMT)

Vizaun Jerál kona-ba Organizasaun no Aproximasaun kona-ba Jéneru

Nota: Tamba istória OMT no OPMT liga malu, favor haree mós ba OPMT nia perfil.

Organização da Mulher Timorese (ne'ebé baibain bolu mós naran OMT) harii iha 1998 hanesan ramu fetu nian iha frente unidade rezisténsia nia laran, Conselho Nacional da Resistência Timorese (CNRT). Iha aspetu balu, OMT nia estrutura orijinál hanesan ho organizasaun fetu Fretilin nian, OPMT. Maibé iha diferença boot ida, OMT harii atu representa no fó atensaun ba fetu sira ne'ebé fó apoiu ba funu independénsia nian, la'ós ba de'it fetu sira ne'ebé halo parte iha partidu polítiku ida. Tamba ne'e, OMT nia formasaun bazeia ba prinsípiu apartidáriu no nakloke ba ema hotu. Prinsípiu ne'e importante atu hametin unidade movimentu independénsia nian. Husi 1998 to'o 2001 fetu barak konsidera sira-nia an hanesan membru OPMT no OMT, no hatán-simu OMT nia lideransa jerál.

Molok referendum iha 1999, OMT nia misaun prinsipál mak atu envolve fetu iha luta atu hetan independénsia nasional. Nia atividade balu hanesan ho OPMT nia atividade sira uluk, hanesan atividade klandestina no atividade rezisténsia nian. OMT mós hala'o kampaña no desenvolve konxiénsia polítika iha comunidade nia laran, buka atu hetan fundus hodi fó tulun ba luta no mobiliza ema atu rejista hodi vota bainhira fó hatene sai tiha opsaun ba referendum. OMT nia lider sira hateten katak iha 1998 organizasaun ne'e iha membru 70,000, ho sekretariadu ida iha *aldeia* idaidak iha Timor Leste laran (De Fatima, '*Mobilising women for the sustainable rebuilding of East Timor*', ne'ebé refere iha Cristalis and Scott, 2005, p. 47).

Ho susesu referendum nian iha 1999 no tranzisaun ba independénsia nasional, OMT hahú haree ba nia knaar no nia misaun. Tamba nia misaun prinsipál ba independénsia nasional hetan tiha ona, OMT nia membru sira hanoin se organizasaun ne'e devia dissolve nia an rasik hanesan CRNT halo iha 2001. Maibé membru barak ne'ebé halo parte iha OMT, durante período lideransa CNRT nian, sai husi OMT hodi konsentra ba OPMT nia reforma. Maibé, envezde dissolve OMT, sira haree katak importante organizasaun ne'e kontinua tanba sei iha nafatin nesiedade boot atu fetu sira hamriik metin iha prosesu harii nasaun ninian.

Hahú independénsia to'o ohin loron, OMT nia membru sira, nia estrutura lideransa no nia atividade, monu maka'as tebes. OMT nia ulun boot sira hateten katak oras ne'e OMT nia membru to'o de'it ema na'in atus haat (400) no rekoñese katak organizasaun ne'e preziza hametin fali nia an. Iha 2006, OMT halo konferénsia nasional ida atu ko'alia kona-ba organizasaun ne'e nia problema no nia futuro. Hanesan OPMT, OMT iha mós difikuldade atu hetan asesu ba fundus, maske nia hala'o projetu hamutuk ho organizasaun internasionál sira hanesan Oxfam no UNDP no envolve hodi harii Rede Fetu.

Hanesan OPMT, iha mós difikuldade atu hetan informasaun kona-ba OMT nia programa sira, razaun ida tanba OPMT no OMT nia grupu sira iha nível aldeia no suku iha autonomia ba sira-nia atividade. OMT nia atividade prinsipál mak programa alfabetizasaun no atividade desenvolvimentu ekonómiku nível kiik, hanesan manejamentu ba negósiu kiik oan sira.

Membru OMT no OPMT kahur malu nafatin, ne'ebé fetu balu reklama fatin ida iha organizasaun rua ne'e hotu, inklui OMT nia líder ida agora ne'e. Maibé harii divizaun entre grupu rua ne'e halo mosu rivalidade no laran-hirus. OMT konsidera nafatin katak nia representa fetu sira ne'ebé envolve iha partidu polítiku, la haree ba afiliasaun polítika ne'ebé

de'it, no iha orgullu tanba nia membru balu tuur iha Parlamentu ka funsionáriu aas iha funsaun públika.

Kontaktu

Tel: (670) 724 4739 (Florentina Smith)

Husi: Trembath, Anna no Damian Grenfell, Mapa ba Lala'ok Buka Igualdade Jéneru: Atividade Ajénsia La Governamentál no Internasionál nian iha Timor-Leste, Globalism Institute, RMIT University, Dili, July 2007, ISBN 978-0-646-47770-1, pp. 55-56.